

Date – 01/04/2025
Time - 7:30 -7:40Hrs

REGIONAL NEWS BULLETIN

HEADLINES (MORNING)

1. Mizoram Universal Health Care Scheme, pawisa fai pek ngai lova damdawi lama inenkawl theihna tur chu vawiin atang hian hman tan a ni dawn a, pawl 2-in an duh lo.
2. Mizoram Poor Federation chuan mipui tana sorkar hnathawkte leh Mizoram universal health care scheme hman duh lova inhnukdawk damdawi-in te chu sorkar thuchhuak pawm a zawm turin an ngen.
3. Delhi-NCR huamchhungah ruihhlo tam tham tak leh a tawlh thin pawl lian tak man an ni.
4. Myanmar lirnghing avanga thi zat chu 2000 chuang an ni tawh.

<><><>

MUHCS

Mizoram Universal Health Care Scheme (MUHCS), pawisa fai pek ngai lova damdawi lama inenkawl theihna tur chu vawiin atang hian hman tan a ni dawn a, pawl 2-in an duh lo.

Sum fai pek ngai lo (cashless) a kalpui tur MUHCS hi April ni 1 atanga a taka hman tan turin March ni 19 khan Chief Minister Pu Lalduhoman a hawng a. Damdawi-in a inenkawlte'n an inekawlna senso pek ngai lova ruahmanna chu Non-Government Hospital Association of Mizoram (NGHAM) chuan tun dinhmuna an zawm theih loh tur thu Mizoram State Health Care Society-a Chief Executive Officer hnenah March ni 28 khan an hriattir a. Mimal leh kohhran enkawl damdawiin-te hi te hi nitina pawisa lut hrang hrang hmanga kal hram hram an nih avangin cashless a nih chuan an inenkawl zo dawn lova, damdawiin sum che vel a buai phah dawn avangin an tandamdawiin enkawl a harsat phah dawn niin an sawi a. Hun kal tawha Mizoram sorkar hnuai Healthcare Scheme hrang hrangte kalpuina-ah NGHAM member damdawi-inte chuan belhkhawmin cheng vaibelchhe 4 chuang an lo hloh tawh niin an sawi bawk. NGHAM chuan Mizoram Universal Health Care Scheme thar duan, cashless hi tun dinhmunah chuan an zawm theih loh thu leh, he mi avanga mipui tawrhna nasa tak lo thleng thei hi pumpelh a nih theih na'n, a hma a re-imburement kalphunga an kal ang khan kal leh phalsak turin an ngen a ni.

Hetih lai hian Mizoram sorkar hnuai a thawk inzawmkhawm pawl Federation of Mizoram Government Employee & Workers (FMGE & W) pawhin MUHCS zawm ve an duh loh thu Chief Minister hnenah tun hnai khan an thlen bawk a. An zawm ve duh loh chhan hrang hrang an tarlan zingah damdawi lama inenkawlna rate tlawm taka siam a nih avangin anmahni'n a hranpin sum tam tak an seng dawn ni a sawi-in an duh lo niin an sawi a ni.

<><><>

POOR FEDERATION

Mizoram Poor Federation chuan mipui tana sorkar hnathawkte leh Mizoram universal health care scheme (MUHCS) hmang duh lova inhnukdawk damdawi-in te chu sorkar thuchhuak pawm a zawm turin an ngen.

He thu hi nimina Aizawl Press Club a chanchinbumite an kawmnaah sawiin an pawl president Pu Lawmthanga chuan ram budget atanga za a 82 vel zet an hlawh leh inrelbawlina atanga hmang sorkar hnathawk an hlawh atanga thla khata thawh tur sorkarin a bituk sak chu hlawh nei lo pawhin inenkawlina tur atana pawisa an thawh dawn lai a an tha a na tlat chu mahni hmasialna nasa tak a ni, a ti a. Sorkar hnathawk lovin kumkhata inenkawl na'n cheng nuai 5 an hman theih lai a sorkar hnathawk nghet tan inenkawlina senso turah bituk a awm lo a. Miretheite inhlawhfa chawpte nena khaikhin pheih chuan hei ai a tam hi thawh inhuam zawk awm tak ni a an hriat thu a sawi a.

Mizorama aia state hausa Karnataka, Kerala state a sorkar hnathawkte pawhin health care atana contribution an pe daih tawh a ni, a ti a. Mizoram sorkar hnuaia hnathawkte'n MUHCS an duh lo hi inngaihtuah tha leh se an duh a. MUHCS hmanga inenkawlina atana pawisa pek lawk ngai lova inenkawlina man kartin emaw thla khat aia rei lo bill sorkarin a peksak thei tur chu a lawmawm hle a ni, a ti a. Damdawi-in thenkhatin MUHCS an hmang duh lo lehzel te chu mipui hriselna leh damna aia pawisa ngainat lutukna ni bera an hriat thu leh hospital zawng zawngin MUHCS chu hmang vek se a duh takzet a ni, a ti bawh.

<><><>

ASF

Tun hnai lawka African Swine Fever (ASF) hri a len thar leh tak avangin he vawk pulhri avang hian vawk 521 thi leh tawhin vawk 107 suat a ni leh tawh bawh niin Vety department hotute chuan an sawi.

Nimin khan Mamit district a Zawlnuam khua-ah vawk 4 a thih belh leh a, Lawngtlai khua a veng 2-ah vawk 7 thi-in Bungtlang South khua-ah 1 a thi bawh a. Nimina vawk thi zawng zawng hi 12 a ni a. Zawlnuam khua-ah ASF vawk pulhri vei 13 suat a ni bawh. Tun dinhmunah hian Lawngtlai district leh Mamit district a khua leh veng 13-ah a leng mek niin Vety department hotute chuan an sawi a ni. Nikum December ni 24 atanga ni 80 chuang ASF vawk pulhri avanga vawk thi leh suat a awm tawh loh hnu-ah March thla laihawl vela vawk thi report dawn a nih leh tak avangin vawk thi leh damlote sample endik hnu chu Guwahati laboratory-ah thawnin March ni 20 khan African swine fever vawk pulhri vang a ni tih arawn finfiah ta a ni.

Kum 2021 chhunga vawk suatsak chhugkaw 2,488 hnenah zangnadawmna hi kum 2022 ah pek an ni a. Kum 2022 chhunga vawk suat chhungkaw 1,915 hnenah za zela 25 chu kum 2024 ah te pek an ni a. Kum 2021 a suatte hnenah cheng vaibelchhe 11, nuai 69, sing 9 leh sang 4 pek chhuah tawh niin kum 2022 a suat sakte hnenah cheng vaibelchhe 2, nuai 63, sing 3, sang 1 leh 500 pek an ni tawh a, a vai-in cheng vaibelchhe 14, nuai 33, sing 2, sang 5 leh 500 pek a ni tawh a ni.

<><><>

TEACHERS

School Education minister Dr. Vanlalhlana chuan tun dinhmunah High School-ah hna nghet 587 a ruak mek a, Middle School-ah hna 1,356 ruak mekin Primary School-ah hna nghet 1,231 a ruak mek a ni a ti.

Minister-in a sawi dan chuan School Education department hnuai a nghet lovin zirtirtu 1,183 lak an ni tawh a. Primary school-ah a nghet lovin zirtirtu 234 lak tum mek a ni a, advertisement chhuah ni tawhin heng hna ruakte hnawhkhat tur hian hmalak mek a ni a. Samagra hnuai thawkte dah nghehna tur dan a hranpa in a awm lova. Amaherawhchu, Mizoram sorkar in CSS hnuai thawkte dah nghehna tur ‘Government of Mizoram Regularisation of Centrally Sponsored Scheme (CSS) Employees Scheme, 2024’ a siam a, hemi a an luh ve theihna tur hian department-in a buaipui mek a ni a ti. Tun dinhmunah dah ngheh an la awm lo niin a sawi a. Sikul hrang hranga thawk tur LDC hi post 270 ah post 136 lai a ruah avangin indaih lohna a nasa a, tun dinhmunah chuan a nei lo sikula dah tur hi sorkarin a la nei rih lo a ni.

Tun dinhmunah hian Govt. High School 22 leh Govt. Middle School 239-ah headmaster nghet an awm lova. Zirtirtu atana lak, an thawhna tur sikul a thawk lova education department pisa lama chhawr (attached) tak zawk hi mi 200 an awm mek bawk a ni. Mizorama zirtirtu nghet awm lohna sikul hi a vaiin 160 a ni a. High school-ah chuan Govt. Vanzau HS-ah zirtirtu nghet an awm lova. Primary school 105-ah zirtirtu nget awm lovin middle school 54-ah zirtirtu nghet thawk an awm lo bawk a ni.



CORPORATIONS

Mizoram sorkar hnuai a sumdawng tura din corporation hrang hrangte enkawlana atan sorkar chuan kumtin cheng vaibelchhe 21 leh nuai 52 chuang a seng thin.

Mizoram Khadi & Village Industries Board (MKVI Board) enkawlana tana kumtina Mizoram sorkar sum sen chu cheng vaibelchhe 13, nuai 20, sing 3 leh sang 5 a ni a, Zoram Industrial Development Corporation Ltd. (ZIDCO) tan cheng nuai 401, sing 7 leh sang 8 sengin Mizoram Food & Allied Industries Corporation (MIFCO) tan cheng nuai 251 leh sang 9 a seng a ni. Zoram Handloom and Handicrafts Development Corporation Limited (ZOHANDCO) tana kumtina Mizoram sorkarin sum a sen chu cheng nuai 164, sing 4 leh sang 7 a ni a. Mizoram Agriculture Marketing Corporation Limited (MAMCO) tan kumtinin cheng nuai 14, sing 4 leh sang 7 a seng bawk.

MKVI Board hnuai hian hnathawk mi 126 an awm a, ZIDCO-ah 32, MIFCO-ah 25, MAMCO-ah 17 leh ZOHANDCO-ah mi 15 an thawk bawk a. Sorkar tana pawisa thawkchhuak tur an nih lai-in Mizoram sorkar hnuai a corporation-te hian an hnuai thawkte hlauh tur atan pawh sorkar sum (share capital) a pek ziah a ngai a. Sum thawh chhuah chu sawi loh kumtina sum tam tham tak an hloh reng avangin kum 2008 khan an chungchang zir chiang tur hian sorkar chuan Deloitte and Touche Consulting India chu a ruai a. Deloitte hian rawtna siamin MAMCO, ZENICS leh ZOHANDCO te chu thiat turin a ti a. MIFCO chu mimal kuta hlan (privatise) a ZIDCO chu thum that (revamp) turin a rawt bawk. Hei hi kalpui mek a nih lai-in sorkar lo ding thar chuan a ngai a kalpui zui-in ZENICS tih loh chu sum tam tak hloh chungin sorkar chuan a la kaltir ta reng a ni.



AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar puan leh a ni ang.



EGG, MEAT PRODUCTION

Artui a Mizoram a intodelh theihna turin Sorkar in hma a la mek zel niin Animal Husbandry and Veterinary department hotute chuan an sawi.

Vety department hotute sawi dan chuan Thenzawl a A.H & Vety. Farm Complex-ah Mega Egg Production Farm din tum mek a ni a, department in NABARD RIDF – XXX hnuai Project sum cheng vaibelchhe 20 leh nuai 60 a hmuh atanga hmalak chhoh tur a ni, an ti a. He Project-ah hian arpui nuai khat vulh theihna tura duan niin Mizorama artui thar lam leh thianghlim tam zawk tharchhuah theihna tura ruahman a ni. Ruahmanna hi zawh fel a nih hunah Public Private Partnership (PPP) hmanga enkawl chhonzawm tum a ni. Sa a Mizoram a intodelh theih na'n north eastern council (NEC) hnuai Project pathum - Lungkawha sial inthlahpunna hmun (Mithun Multiplication Centre), Lengpui a tam thama vawk vulhna tur (Integrated Piggery Farming) ruahmanna leh Ailawng a tam thama vawk leh ar vulhna hmun tur (Integrated Piggery & Poultry Farming) te chu ruahmanna lian tham kalpui mek a ni.



DRUG SEIZED

Delhi-NCR huamchhungah ruihhlo tam tham tak leh a tawlh thin pawl lian tak man an ni. Union Home Minister chuan he thu hi Social Media-ah tarlangin Narcotics Control Bureau-NCB leh Delhi Police tangkawp chuan heng ruihhlo zuar te kut atang hian methamphetamine, MDMA leh Cocaine cheng vaibelchhe 27 chuang hu an man a ti a. Heng ruihhlo kaihnawihah hian mi 6 man niin an zinga 5 chu Africa lam mi niin Nigeria-a chhungkaw hung tak an nih thu a sawi. Pu Shah-a chuan NCB leh Delhi Police te chu an hlawhtlinnaah a lawmpui thu a sawi bawk a ni.



UNION HM

Union Home Minister Amit Shah-a chuan Narendra Modia sawrkar chuan kum 10 chhungin ramchhunga damdawiin leh hmasawna ruhrelte a tihhmasawn nasat thu a sawi. Nimina Hayrana-a Maharaja Agrasen Medical College-a Maharaja Agrasen-a lim a hawnaah he thu hi sawiin Pu Shaha chuan health sector lamah huam zau takin hmalak anih avangin hmasawna tam tak a thleng a ni a ti bawk.

Union Home Minister hian ICU thar hawngin postgraduate hostel sakna tur lung a phum bawk a ni.



EARTHQUAKE

Myanmar lirnghing avanga thi zat chu 2000 chuang an ni tawh.

Myanmar sipai hotute sawidanin mitthi hi 2052 an tling tawh a. Hliam tuar hi 3900 chuang awmin mi 270 chin hriat lohin an la awm a ni.

Puan tawh angin Zirtawpni chawhnu khan Myanmar-ah na takin tum hnih lir a nghing a. Lirnghing hi a nat zawng tehna ritcher scale 7.7 leh 6.4 an ni a. Mandalay leh a chhehvel chu lirnghing tuar na ber an ni a. An lei hmingthang Ava Bridge chu Irrawaddy luiah a chim a, in leh bungraw tam tak a chhe bawk nia thudawn a ni. Lirnghing hi Thailand, Vietnam, Laos leh China chhimthlang lamah pawh hriat a ni a. Thailand-ah hian lirnghing avanga chhiatna thlengah mi 19 an thi tawh a ni.

India chuan Myanmar lirnghing tuarte chhawmdawl beihpui Operation Brahma chu ngawrh takin a kalpui mek a. Ei leh in leh chhanchhuahna hmanrua, damdawi leh bungrua chi hrang hrang a thawnlut mek a ni.

<><><>